

Date – 03/05/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan nimin khan Mizoram Rural Bank Branch Manager Conclave 2026 chu khuallian niin a hmanpui.
2. Mizoram RGGLV Distributor Association President Pu Vanlalvuta Chinzah chuan Iran leh USA buaina chuan eirawngbawlina gas a nghawng tih a sawi.
3. Mizoram Entrepreneurs' Chamber buatsaih Mizoram Entrepreneurs' Conference vawi 1-na chu Woodland Hills, Zonuamah nimin khan neih a ni.
4. Communications Minister Jyotiraditya Scindia chuan nimin khan India rama rikrum thila inbiakpawhna tihchakna tur leh mipui himna tihchangtlunna tur Cell Broadcast System (CBS) a tlangzarh.

<><><>

CHIEF MINISTER

Chief Minister Pu Lalduhoma chuan nimin khan Mizoram Rural Bank Branch Manager Conclave 2026 chu khuallian niin a hmanpui.

Mizoram Rural Bank Head Office-a hun hmanah hian Pu Lalduhoma chuan, India rama Regional Rural Bank thangduang tak, Mizoram Rural Bank, mizoten an nei chu a hlu hle a ti a. CD Ratio nei tha ber pawl Bank an ni reng mai chu a chhuanawm a ti a. Bank te CD ratio a san hian an sum dawn khawm te mipuite tan an pe chhuak tam tihna a ni a. Ram hmasawn nan chu chu a pawimawh a ni, a ti.

Chief Minister Pu Lalduhoma chuan Bank Manager te chu sorkar policy a taka chantirtute an nihna chen a awm a ti a. Sorkar flagship programme Bana Kaihah phei chuan an ni leh zual tiin, Mizoram hmasawanna tura tih theih an ngah hle a, an beisei sang tih a sawi bawk.

Pu Lalduhoma chuan sawi zawmin, Mizoramah financial literacy sang zawk mamawhna a nasa a, thingtlang lamah mipuiten bank an mamawh em em tih sawiin an tana dawr awlsam leh zangkhai neih a tul bawk a ti a. Mipuite mamawh phuhru theitu ber tur chu MRB te hi in ni a ti.

(MRB hi kum 1983 September ni 27-ah a ding tan a, Mizoram Rural Bank ah hian Govt of India in share 15%, Sponsor Bank SBI in 35% leh Govt of Mizoram in 50% an nei a ni. Regional Office 2 bakah Branch hi 106 an nei tawh a, chung zinga 60 chu thingtlanga awm an ni. Thawktu hi 491 an awm mek a ni.)

<><><>

LPG

Mizoram RGGLV Distributor Association President Pu Vanlalvuta Chinzah chuan Iran leh USA buaina chuan eirawngbawlina gas a nghawng tih a sawi.

Tunhnaia sorkar laipuiin commercial gas bur man a tihsan chungchanga Akashvani News in kawmnaah he thu hi sawiin Pu Vanlalvuta Chinzah chuan eirawngbawlina gas bur lian chi, commercial cylinder chu thla hmasa ni 1-ah cheng 2,573 man niin tun thla ni 1 atangin cheng 3,567 man a nih thu a sawi a. Bur khat man chu cheng 994 in a to ta tih sawiin heti hian kg 1 zelah cheng 52.03 in a to belh a. Hei hi a chhan bulpui ber chu Iran leh USA inkara buaina avanga khawvel pumpuia oil leh gas supply buai vang a ni a ti.

Pu Vanlalvuta Chinzah chuan buaina chinfel a nih loh avangin gas a harsa chho tih sawiin chuti chung chuan sorkarin theihtawp a chhuah a ti a. A bur lian man chauh ti toin eirawngbawlina gas bur pangngai, domestic cylinder man bik chu mitin mamawh a nih avangin a la ti to lo tih a sawi a ni.

Pu Vanlalvuta chuan Mizoram eirawngbawlina gas supply chu a harsa tan tawh a ti a. Mahni hmanga connection nei lo, mahni ina hmang ve tho si te'n a hma chuan gas an la ve thei mai thin a, tunah chuan an la thei tawh lo a, an buai hle tawh a ni a ti.

Eirawngbawlina gas chu In tinin bur 2 aia tam bur an kawl tlangpui avangin khawlkhawmin eng emaw chen a la veng ni a hriat a ni a ti a. Heng khawlkhawm sa te hi mipuiten an hmang zo tan tih sawiin tun ang renga a kal chuan May thla tawp lamah chuan mipuite an buai chhoh mai a rinawm a. Tunah hian eirawngbawlina gas supply chu khaihlak angin langlo mahse a tak takah chuan a muang chho hle niin a sawi bawh a ni.

<><><>

MIZORAM ENTREPRENEURS' CONFERENCE

Mizoram Entrepreneurs' Chamber buatsaih Mizoram Entrepreneurs' Conference vawi 1-na chu Woodland Hills, Zonuamah nimin khan neih a ni.

He huna khuallian Dr H. Lianzela, Secretary & Director, Commerce & Industry chuan Entrepreneurs te chu kan ram economy than zelna tura mi pawimawh tak in ni, a ti a, "Ease of doing business" ah hmasawn turin hma kan la mek a ni, a ti bawh. Kan ramah hian chawlhni kawr aia hnathawh kawr neih tam zawk a tul thu a sawi bawh. Mizoram in mellung thar - ram nuam leh intodelh a nih theihna tura mi tangkai leh pawimawh tak ni turin entrepreneurs te a sawm a ni.

Mizoram Entrepreneurs' Chamber (MEC) hi kumin January ni 5 khan din a ni a, member mi 57 vel an awm a ni. Mizoram Entrepreneurs' Conference hi Entrepreneurs lama Mizoramin hmasawna kan neih theih nan a buatsaih niin he conference-ah hian project finance, marketing, leh experience sharing te neih a ni a, conference-ah hian mi 60 vel an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PHAWNGPUI CLOSED

Furpui lo thleng tur leh National Park chhunga nungcha chi hrang hrangte in thlahpun hun a nih chhoh avangin Phawngpui National Park chu May ni 1 atanga October ni 31 thleng khar a ni a.

Hriattirna hi Chhimtuipui Wildlife Division Deputy Conservation of Forest chuan tichhuakin, nungcha leh sava te ralmuang leh him taka an awm theih nan te leh an mahnia an in siamthat theih nan Phawngpui National Park hi khar a ni a ti a, ramsa leh Nungcha humhalh kawng aj mipuite tawiawmna a ngen tih a sawi bawk.

<><><>

HNAHTHIAL MZP

Mizo Zirlai Pawl Headquarters Hnahthial chuan nimin khan MZP Pisa, Bazar veng Hnahthialah khawpui chhunga hnam dang awm zawng zawng te chhiarpui neiin a ko khawm.

MZP Headquarters Hnahthial Executive Committee Meeting 2026-2028 term-a vawi khatna in a lo rel tawh bawhzuiin MZP chuan Hnahthial khawpui chhunga hnam dang awm zawng zawng te chhiarpui a nei a, he hunah hian hnam dang mi 105 chhinchhiah an ni.

Chhiarpui neih rual hian MZP chuan Hnam dang te Inner Line Permit (ILP) an endik nghal a. Hnam dang kalkhawm te chu ILP nei ngei ngei tur leh dan ang taka hna thawk turin an chah a. Mizo te nena tha taka thawhhona nei tur leh midangte tana hnawksaka awm lo turin MZP chuan an chah a ni. MZP chuan tun hnaia Mizo hmeichhe chungamawi lo taka hnam dang che an hriat thu leh tha lo an tih thu sawiin, Mizo hmeichhiate lakah MZP chu a thikthu a chhe zel dawn tih an hrilh a, hetiang thil hi MZP in a hre leh a nih chuan na takin action a la tawh dawn tih an sawi a ni.

MZP chuan hnam dang sponsor-tu te pawh dan dik takin an thawk em tih leh an ILP validity chu ngaipawimawh zual turin an chah bawk a ni.

<><><>

THENZAWL RAILWAY

Chief Minister Pu Lalduhoma chuan Thenzawlah Rel a luh theih nan hmalak mek a ni tih a sawi.

Tun hnai khan Pu Lalduhoma hian Thenzawl Auditorium-ah Serchhip Sub-Headquarters YMA Inkhawmpui a hmanpui a, he hunah hian Chief Minister chuan Thenzawl Peace City Project leh SASCI Green Field City ruahmanna kalpui mek a ni tih sawiin, Thenzawl-ah hian Rail a luh thlen theih nan hmalak mek a ni a ti bawk.

Chief Minister chuan halaite chu chhungril nun siam tha a, ruihhlo laka fihlim tur leh ram dang officer-te el pha tura National level competitive exam-te

hmachhawn tam turin a fuih a, hlawhtlinna chang ngei thei turin taihmakna leh tumruhna nei turin a fuih bawk a ni.

<><><>

Cell Broadcasting System

Communications Minister Jyotiraditya Scindia chuan nimin khan India rama rikrum thila inbiakpawhna tihchakna tur leh mipui himna tihchangtlunna tur Cell Broadcast System (CBS) a tlangzarh. CBS hi Department of Telecommunications hnuai Centre for Development of Telematics (C-DOT)-in National Disaster Management Authority leh Ministry of Home Affairs te nen tangkawpin an siam a ni.

Nimin khan ram pum huapin Cell Broadcasting system hi hlawhtling taka enchhin a ni a, hemi chhung hian ram puma mobile phone-ah emergency alert message thehdarh a ni. Chawhnu ah mipuite phone-ah siren alert nei notification thawn hmanga enchhin a ni.

Communications Minister chuan India rama disaster management tidanglamtu a nih thu a sawi a, hei hian mipuite venhim kawngah hmasawna a lantir a ni a ti a. Telecom technology tha tak tak hmangin CBS chuan near a hun tak leh hmun takah alert chu mi maktaduai tam tak hnenah hmaihib nei hauh loin a thawn chhuak theih thu a sawi bawk a ni.

<><><>